

Sin control financiero y economia solido no por introduci dollar na Aruba



Jorge Ridderstaat

ORANJESTAD —

Dolarisacion tin beneficienan grandi y por nifica un atraccion grandi pa inversion nobo. Pero e no ta sin mas e solucion manera tur hende ta spera. E ta nifica tambe cu ta entrega control di economia den man di e pais cu ta produci dollar, esta Merca. Y sin un sosten den lomba, manera ta e caso cu islanan BES, e no ta un paso cu por tuma sin mas, ya cu e ta trece su risiconan grandi.

Banco Central di Aruba ta siguiendo e desaroyo na Islanan Bes hopi di cerca y tambe a tuma nota di e interes continuo di tanto Corsow como St. Maarten pa considera dollar como moneda di pago. Motibo ta cu dolarisacion na Islanan BES sigur lo tin efecto pa Aruba, particularmente pa motibo cu e proceso ta bay man den man cu otro cambionan. Na momento cu Islanan BES introduci leyman fiscal mas atractivo y den combinacion cu un economia di dollar, e ta haci'e mas bentahoso pa inversionistanan establece nan mes riba e tres islanan Hulandes. Pues, Islanan BES ta bira mas atractivo pa inverti, tumando na cuenta tur e factornan aki. Con cu bay bin, un inversionista na e momento ey no mester preocupa cu e gasto pa 'cumpra' dollar, manera ta e caso na Aruba awor aki. Na Aruba, tur compania cu ta traha cu exterior y mester uza dollar, tin cu paga e asina yama deviezen provisie, esta un tipo di impuesto pa uzo di dollar. Boneiro tabata cobra un tarifa pa licencia compra di dollar

y awor esey no ta existi mas. Pues, e gasto pa haci negoshi na Islanan BES diripiente a bira menos.

Ademas, dolarisacion ta limita restriccion monetario, y consequentemente taza di interes tambe por baha pa fianzanan, sigur esnan di exterior ya cu den esakinan ta inclui un prima di risico pa cubri e taza di cambio.

Pero mas cu tur cos, dolarisacion ta un decision politico, segun Ridderstaat. E decision pa elimina propio moneda tin efecto diferente cu solamente esun economico. E ta nifica cu ta perde un factor propio y un Banco Central ta perde un gran parti di su funcion, como e instancia cu ta hiba un maneho monetario di un pais.

Sinembargo, dolarisacion los di tur beneficio, ta haci un pais completamente dependiente di economia Mericano. Pues, cualkier desaroyo na Merca lo afecta economia di un pais dolarisa, sin cu e pais ey mes tin mucho control. Boneiro, por ehempel, mescos cu Aruba ta economicamente mara na comercio cu Merca, entre otro pa medio di turismo, pues introduccion di dollar ta un proceso logico. Pero, Boneiro, Saba of St. Eustatius tin algo cu Aruba no tin. Nan tur tres ta islanan cu ta cay directamente bou Hulanda y semper lo por conta cu yudanza di e pais Madre en caso algo bay robez. Corsow y St. Maarten tabatin intencion tambe pa introduci dollar y te ainda ta contemplando e idea ey. Sinembargo, un exigencia di Hulanda tabata pa forma un solo maneho monetario pa ambos. Mas ainda, tanto Corsow como St. Maarten a haya un empuhe financiero na momento cu Hulanda a absorba gran parti di e debe publico astronomico di Antias Hulandes.

Na Aruba, e situacion ta diferente. Pa introduci dollar como moneda, enbez di florin, situacion financiero di e pais mester ta solido, mientras cu economia mester por produci suficiente divisas, pa asina un dia no por keda sin 'dollar.' Awor aki, Banco Central por trece cierto control den e trafico di placa, na momento cu

no tin suficiente dollar pa cubri gastonan na Aruba. Mas ainda, na momento cu mester di dollar ta cobra e asina yama deviezen provisie cu ta yuda e genera placa pa cubri gastonan.

Na momento cu Gobierno ta haci prestamonan continuo pa cubri su deficit, e ta uza dollar pa paga e debe y interes Mester paga importacion na dollar y si e entradanan di economia, of turismo den e caso na 2010, no tabata suficiente, Aruba por keda sin dollar, y sin un control di Banco Central, lo no por haci mucho den un caso asina. Pues, un condicion pa introduci dollar sigur ta un presupuesto balanza, algo cu Aruba no por logra por lo pronto. E debe nacional mes a yega na 52 porshento cu ta un suma astronomico.

Corsow y St. Maarten, banda di e hecho cu Hulanda a absorba hopi di nan debe, tambe tin supervision financiero for di Hulanda pa evita cu nan ta bolbe yega na un situacion di debe sin por paga. Aruba no tin e supervision aki.



Banco Central di Aruba

Inflacion tambe ta un factor cu ta dreña den wega na momento di introduci dollar como moneda oficial di pago. Banco Central na e momentonan aki, cu florin, pa medio di su maneho monetario por mitiga inflacion dor di tuma medidanan efectivo. Den caso cu no tin florin mas, ta Merca ta determina nivel di inflacion. Ademas, gobierno tambe ta perde na momento cu introduci dollar. Ridderstaat a papia aki di seniorage of segun su

termino oficial 'seigniorage,' cu ta nifica e ganashi cu ta haci na momento cu imprimi biyetenan of monedanan. Por ehempel, un biyete di 100 florin ta costa Banco Central 1 florin. E diferencia di 99 florin ta e seniorage y ta ganashi pa e instituto, y finalmente ta ganashi pa Gobierno. Cu dolarisacion, e entrada pa Gobierno aki ta desaparece, mientras cu Gobierno tambe lo perde su entrada pa medio di e deviezenprovisie.